

**MINISTARSTVO UNUTRAŠNJIH POSLOVA KANTONA SARAJEVO – UPRAVA
POLICIJE, La Benevolencija br. 16, koju zastupa policijski komesar Generalni
inspektor policije Fatmir Hajdarević, (u daljem tekstu: Ugovorni organ)**

i

**KM TRADE d.o.o Visoko, Čaršijska bb, ID: 4218204070008, koga zastupa direktor
Nihad Mašić (u daljem tekstu: Dobavljač)**

zaključili su:

UGOVOR O SUKCESIVNOJ NABAVCI USLUGA SERVISIRANJA VOZILA ZA SPECIJALNE NAMJENE U GARANTNOM ROKU

Član 1.

Predmet ovog ugovora je nabavka i sukcesivno vršenje usluga servisiranja vozila za specijalne namjene u garantnom roku za potrebe Uprave policije Ministarstva unutrašnjih poslova Kantona Sarajevo.

Nabavka je izvršena putem otvorenog postupka, na osnovu Odluke broj 02-11-4-9136/25 od 26.12.2025. godine.

Ugovor se zaključuje u skladu sa uslovima iz tenderske dokumentacije, ponudom Dobavljača, odredbama Okvirnog sporazuma broj 02-11-4-9136-7/25 od 25.02.2026. godine i stvarnim potrebama Ugovornog organa.

Ponuda Dobavljača broj 191/26-1 od 07.01.2026. godine sastavni je dio ovog ugovora.

Član 2.

Usluge iz člana 1. ovog ugovora će se izvršavati sukcesivno, prema narudžbama Ugovornog organa, u zavisnosti od potreba Uprave policije.

Ukupna vrijednost ovog ugovora bez PDV-a iznosi 35.900,00 (tridesetpet hiljadadevetstotina i 00/100) KM.

Dobavljač se obavezuje na nepromjenjivost ponuđenih cijena tokom cijelog ugovorenog perioda i da će pod istim uslovima u periodu trajanja ovog ugovora vršiti isporuku predmetnih usluga.

Član 3.

Dobavljač se obavezuje da će u roku od deset (10) dana od dana obostrano potpisanog ugovora dostaviti garanciju za uredno izvršenje ugovora u obliku bezuslovne bankarske garancije u iznosu od 5% od vrijednosti ugovora sa klauzulom plativo na prvi pisani poziv korisnika garancije i bez prava prigovora, sa rokom važnosti: rok izvršenja ugovornih obaveza + 30 dana.

Ukoliko garancija za uredno izvršenje ugovora nije dostavljena na propisan način, shodno uslovima iz tenderske dokumentacije i u roku koji je odredio ugovorni organ, zaključeni ugovor će se smatrati apsolutno ništavim.

Garancija za uredno izvršenje ugovora realizuje se u slijedećim slučajevima:

- u slučaju raskida ugovora krivnjom Dobavljača zbog kršenja odredaba zaključenog ugovora, pod uslovom da je prethodno pismeno obaviješten o svakom propustu da postupi po ugovoru i da u ostavljenom roku nije izvršio ispravku takvih propusta;
- u slučaju otkazivanja ugovora od strane Dobavljača prije isteka roka na koji je isti zaključen, pod uslovom da razlog za otkaz nije nastupio kao posljedica kršenja odredaba ugovora od strane Ugovornog organa.

Član 4.

Usluge servisiranja (uključujući autolimarske/lakirerske radove) vozila za specijalne namjene u garantnom roku vršit će se na adresi servisa Dobavljača ul. Ismeta Alajbegovića Šerbe 16, 71210 Ilidža - Sarajevo. U slučaju da se servis ponuđača nalazi izvan Kantona Sarajevo, izabrani ponuđač snosi troškove transporta vozila.

Ponuđač je obavezan da obezbijedi transport vozila od granice prelaska iz Kantona Sarajevo do servisa izabranog ponuđača i nazad, te da te troškove uključiti u cijenu ponude.

Dobavljač je dužan da:

- snosi troškove transporta vozila (troškovi transporta će se obračunavati na način da će Ugovorni organ obezbijediti podatak o prosječnoj cijeni naftnih derivata - koje izdaje Federalno ministarstvo trgovine u trenutku potpisivanja ugovora (PC), te tačnu kilometražu do granice prelaska iz Kantona Sarajevo do servisa dobavljača i nazad (K); obračun troškova transporta (T) će se vršiti po formuli $T=PC*K/10$ za svako pojedinačno motorno vozilo nakonjem se bude vršio servis za vrijeme trajanja ovog ugovora (za iznos troškova transporta će se umanjiti vrijednost svake pojedinačne fakture).

Vozilima za specijalne namjene Uprave policije ne mogu upravljati lica koja nisu zaposlena u policiji. Ukoliko se autolakirerska radionica ne nalazi na istoj adresi kao servis Dobavljača, potrebno je da, u slučaju potrebe prevoza motornog vozila, Dobavljač o tome bez odlaganja obavijesti Ugovorni organ kako bi se izvršio prevoz vozila u skladu sa pozitivnim pravnim propisima.

Član 5.

Dobavljač je dužan da posjeduje važeće ovlaštenje/certifikat proizvođača za servisiranje vozila za specijalne namjene u garantnom roku, te da osigura da ovlaštenje proizvođača za servisiranje vozila bude važeće tokom cijelog trajanja garantnog roka, odnosno za cijelo vrijeme izvršenja ugovornih obaveza.

U slučaju isteka, suspenzije ili opoziva ovlaštenja proizvođača, izabrani dobavljač je dužan bez odlaganja obavijestiti Ugovorni organ i obezbijediti drugo važeće ovlaštenje proizvođača, bez dodatnih troškova za ugovorni organ. Neispunjavanje obaveze servisiranja vozila za specijalne namjene u ovlaštenom servisu tokom garantnog roka smatrat će se bitnom povredom ugovornih obaveza i može biti osnov za raskid ugovora i/ili aktiviranje ugovorne kazne.

Ugovorni organ zadržava pravo provjere vjerodostojnosti dostavljenih ovlaštenja direktno kod proizvođača.

Član 6.

Dobavljač je dužan da:

- motorno vozilo primi u rad u roku od 24 sata od najave Ugovornog organa i da u roku od tri dana izvrši uslugu popravke/servisiranja, usluga servisiranja se može prolongirati iz opravdanih razloga, ali ne duže od 15 (petnaest) dana
- vozila Ugovornog organa uzima u rad kao prioritetna
- omogućiti prisustvo lica iz organizacione jedinice Autoservisa Ugovornog organa za vrijeme trajanja servisa
- ugovorene usluge izvrši u svemu prema tehničkoj dokumentaciji, propisima, standardima i normama kvaliteta koji važe za vrstu usluga koje su predmet nabavke, te da će stručno i kvalitetno obavljati usluge servisa motornih vozila Ugovornog organa
- usluge pruža u skladu sa zahtjevom Ugovornog organa i da će odmah postupiti po eventualnim primjedbama Ugovornog organa u pogledu nedostataka na ime kvaliteta izvršene usluge.

- prilikom ugradnje koristiti isključivo nove i nekorištene dijelove kompatibilne sa vozilom u koje se ugrađuju, koji obezbjeđuju sigurno i optimalno korištenje vozila i koji su preporučeni od strane proizvođača vozila. Ugovorni organ zadržava pravo da u slučaju sumnje izvrši provjeru da li je ugrađeni dio nov i nekorišten, koju provjeru će izvršiti ovlašteni sudski vještak mašinske struke.

Član 7.

Nakon izvršene usluge koja je predmet ugovora vrši se kvalitativno - kvantitativna primopredaja vozila u servisu Dobavljača uz sačinjavanje radnog naloga. Radni nalog treba da sadrži: naziv firme, adresa, kontakt, broj, datum, marka/tip vozila, nalogodavac, specifikaciju ugrađenih dijelova, dužinu garancije za ugrađene dijelove, uočene kvarove ili nedostatke, normirano vrijeme koje je utrošeno za svako servisiranje pojedinačno, potpis Dobavljača i potpis lica iz organizacione jedinice Autoservis, kao ovlaštenog predstavnika Ugovornog organa, te napomena vezana za stanje vozila i sl. Radni nalog se izdaje u dva primjerka od kojih svaka strana zadržava po jedan.

Ukoliko se konstatuju određeni nedostaci u kvalitetu ili kvantitetu izvršenih usluga sačinit će se zapisnik o reklamaciji.

Član 8.

Garancija za izvršene usluge servisiranja ne može biti kraća od 12 (dvanaest) mjeseci od datuma izvršenja usluge.

Garantni rok na ugrađene dijelove je minimalno 1 (jedna) godina - prema uputstvu proizvođača i počinje da vrijedi od datuma kvalitativno kvantitativne primopredaje.

Član 9.

Dobavljač se obavezuje priznati reklamaciju na kvantitet i kvalitet izvršenih usluga, koja će biti proračunata zapisnikom o reklamaciji, uz obavezno navođenje nedostataka izvršene usluge. Isto se odnosi i ukoliko se greške uoče za vrijeme važenja garancije iz člana 6.

Dobavljač je dužan da greške otkloni u roku od 7 (sedam) dana od dana sastavljanja zapisnika.

Usluga će se smatrati uredno izvršenom tek kada bude konstatovano da je primopredaja izvršena bez primjedbi.

Član 10.

Ugovorni organ će ugovorenu cijenu za servisiranje vozila za specijalne namjene u garantnom roku plaćati Dobavljaču u roku od 30 (trideset) dana od dana urednog izvršenja usluge i dostavljanja pojedinačne fakture za svako servisirano vozilo, na tekući račun Dobavljača.

Član 11.

U slučaju kašnjenja u pružanju usluga, do kojeg je došlo krivicom odabranog ponuđača, isti će platiti ugovornu kaznu u skladu sa Zakonom o obligacionim odnosima u iznosu od 0,03% naručene usluge, za svaki dan kašnjenja do urednog ispunjenja, s tim da ukupan iznos ugovorene kazne ne može prijeći 10% od ukupno ugovorene vrijednosti usluge koja je predmet narudžbe. Odabrani ponuđač je dužan platiti ugovorenu kaznu u roku od 7 (sedam) dana od dana prijema zahtjeva za plaćanje od Ugovornog organa.

Ugovorni organ neće naplatiti ugovorenu kaznu ukoliko je do kašnjenja došlo usljed više sile. Pod višom silom se podrazumjeva slučaj kada ispunjenje obaveze postane nemoguće zbog vanrednih vanjskih događaja na koje izabrani ponuđač nije mogao uticati niti ih predvidjeti.

Član 12.

Ukoliko poslije zaključenja ovog ugovora nastupe okolnosti više sile koje dovedu do ometanja ili onemogućavanja izvršenja obaveza definisanih ugovorom, rokovi izvršenja obaveza će se produžiti za vrijeme trajanja više sile.

Viša sila podrazumijeva ekstremne i vanredne događaje koji se ne mogu predvidjeti, koji su se dogodili bez volje i utjecaja strana u ugovoru i koji nisu mogli biti spriječeni od strane pogođene višom silom.

Višom silom mogu se smatrati poplave, zemljotresi, požari, politička zbivanja (rat, neredi većeg obima, štrajkovi), imperativne odluke vlasti (zabrana prometa uvoza i izvoza) i sl.

Strana u ugovoru pogođena višom silom odmah će u pisanoj formi obaavijestiti drugu stranu o nastanku nepredviđenih okolnosti uz prilaganje odgovarajućih dokaza.

Član 13.

Ugovorni organ zadržava pravo raskida ugovora ukoliko izvršena usluga u smislu kvaliteta i svih drugih elemenata ne bude u potpunosti odgovarala uslovima iz prihvaćene ponude Dobavljača.

Član 14.

Dobavljač nema pravo zapošljavati, u svrhu izvršenja ovog ugovora fizička ili pravna lica koja su učestvovala u pripremi tenderske dokumentacije ili su bila u svojstvu člana ili stručnog lica koje je angažirala Komisija za nabavke Ugovornog organa, najmanje 6 (šest) mjeseci po zaključenju ovog ugovora, odnosno od početka realizacije ovog ugovora.

Član 15.

Ugovorni organ zadržava pravo da u slučaju kašnjenja ili neizvršenja ugovorenih obaveza ovaj Ugovor raskine. Ugovorne strane mogu raskinuti ovaj ugovor i prije njegove realizacije, ukoliko se jedna strana ne bude pridržavala njegovih odredbi, uz prethodno izmirenje svih obaveza utvrđenih po ovom ugovoru. Otkazni rok je 15 (petnaest) dana, a po isteku ovog roka Ugovor se smatra raskinutim. O otkazu ugovorne strane se obavještavaju pismenim putem.

Ugovorni organ zadržava pravo raskida ugovora ukoliko isporučena roba u smislu kvaliteta i svih drugih elemenata ne bude u potpunosti odgovarala uslovima iz prihvaćene ponude Dobavljača.

Ugovorne strane su saglasne da svaka strana može jednostrano raskinuti ovaj ugovor i zadržati pravo na naknadu štete zbog raskidanja ugovora u slijedećim slučajevima:

- ako Dobavljač kasni sa isporukom, a zakašnjenje nije posljedica vanrednih okolnosti (više sile);
- ako Dobavljač dođe u situaciju da ne može ispoštovati ugovor (stečaj, likvidacija i sl.);
- ako neka od ugovornih strana svoje dospjele obaveze ne ispuni ni u naknadno prihvatljivom roku za sve ugovorne strane;
- ako je iz okolnosti posla jasno da jedna od ugovornih strana neće moći ispuniti svoju obavezu i onda kada bilo koja ugovorna strana izjavi da svoju obavezu neće ispuniti.

Obavještenje o jednostranom raskidu ugovora mora se dostaviti drugoj ugovornoj strani isključivo u pismenom obliku.

Raskidanjem ugovora, smatra se raskinutim i okvirni sporazum na osnovu kojeg je zaključen ovaj pojedinačni ugovor.

Član 16.

Na ostala prava i obaveze ugovornih strana, koja nisu regulisana ovim okvirnim sporazumom, primjenjivat će se odredbe Zakona o obligacionim odnosima.

Član 17.

Eventualno nastale sporove pri realizaciji ovog ugovora, ugovorne strane će rješavati sporazumno, a ukoliko to nije moguće, utvrđuje se stvarna nadležnost Suda u Sarajevu.

Član 18.

Ovaj ugovor izrađen je u četiri (4) istovjetna primjerka, od kojih po dva (2) zadržava svaka ugovorna strana.

Ugovor stupa na snagu danom potpisivanja ovlaštenih predstavnika ugovornih strana i traje do realizacije ugovorenih obaveza ugovornih strana, odnosno do izmirenja dužničko-povjerilačkih odnosa, a najduže 1 (jednu) godinu od dana obostranog potpisivanja ugovora.

DOBAVLJAČ
KM TRADE d.o.o Visoko



Direktor Nihad Mašić

Broj: 234/26
Datum: 04.03.2026.

UGOVORNI ORGAN
MUP KANTONA SARAJEVO
UPRAVA POLICIJE



POLICIJSKI KOMESAR
Generalni inspektor policije
Fatmir Hajdarević

Broj: 02-11-4-9136-8/25
Datum: 26.02.2026. godine